



Mwh hwnj dangz suyo, lauxsae naeuz: “Aen danhyenz gonq raeuz hag le fuengfap bitsuenq song vih soq swngz song vih soq, aen danhyenz neix raeuz couh daeuj hag fuengfap baksuenq song vih soq swngz song vih soq. Daihgya siengjsiengj fuengfap baksuenq dwg gijmaz?”

Lauxsae ngamq gangj dingz, gyoengq doengzhag couh mwngz coenz gou coenz daujwn hwnjdaej lo.

“Ciuq fuengfap cigsik suenq.”

“Dangyienz aeu baenz bouh baenz bouh suenq lo.”

“Sien aeu aen swngz soq he bae swngz soqgovei lingh aen soq, caiq swngz soqcibvih.” Daihgya mwngz coenz gou coen cauzhuhu.

Gou caeuq boux doengzhag

najdaiz gou hix doxcwngq hwnjdaej. Doengzhag najdaiz gou gig miz saenqsim naeuz: “Gou roxnyinh dangyienz aeu youq ndaw uk siengj cigsik, yienzhaeuh caiq suenq.” Gou sikhaek buek de naeuz: “Yienghneix caeuq fuengfap bitsuenq miz maz mbouj doengz, gou roxnyinh wnggai aeu ndawde aen swngzsoq he baen baenz aen cingj cibsoq he caeuq aen soq vih soq he, caiq yungh lingh aen swngzsoq baenbied bae swngz cingj cibsoq caeuq aen soq vih soq he haenx, yienzhaeuh aeu ndaejsoq doxgya, doeklaeng ndaejsoq couh dwg gij ndaejsoq diuz daez neix.” “Mwngz yienghneix guh geijlai mazfanz ha. Lumj gou yienghneix cijaeu gij ginggvaq bitsuenq haenx siengj bienq ndeu couh rox ndaejsoq lo.” De daekeiq vauvau naeuz. “Mwngz yienghneix gig yungzheih

suenq loek, lumj gou yienghneix aeu aen swngzsoq he baen baenz aen cingj cibsoq caeuq aen soq vihsoq he, neix couh dangq swngzfap song aen song vihsoq swngz vihsoq he, yienghneix gawq genjdanh youh suenq ndaej cinj.” Gou mbouj fug saw laebdaeb fanjbuek de. Couh yienghneix song boux dou ceng cungj mbouj dingz, byawz hix mbouj fug byawz.

Gyoengq doengzhag youq henz haenx hix foenfoen cienq gyauej gvaqdaej yawj song boux dou “bueklwnh”, daihgya nyaenx mbouj ndaej hix gya haeujdaej bueklwnh. Gyoengqde swhyienz baen baenz song baij. Lij Mingz cingzcek itcig gig ndei haenx doengzeiq gij gvanhdenj gou, de naeuz baksuenq couh aeu genhdanh, suenq cinj; Vangz Li swnhsienh haenx doengzeiq

gij gangfap Vangz Yij, de naeuz baksuenq couh wnggai fuengbienh, yaek siengj suenq ndaej cinj couh wnggai yungh cigsik. Gij doengzhag wng gangj mbouj ok gij gvanhdenj swheij, cijdwg riengz sing doengzeiq gij gvanhdenj song boux de.

Lauxsae yawj dou doxcwngq ndaej baenzneix haenq, couh heuh gyoengq doengzhag dingh roengzdaej. De riu dwk hawj song boux dou baenbied gangj ok gij gvanhdenj swheij. Lauxsae dingq le hozunq doiq gyoengq doengzhag naeuz: “Fuengfap Vangz Yij fuengbienh, youq ndaw uk siengj ok cigsik yienzhaeuh suenqsoq dwg gig fuengbienh, gou doengzeiq. Fuengfap Leiz Sunghloz hix miz dauhleix, de dawz aen swngzsoq he baengej, aen fuengfap neix gig giuj, genjdanh fuengbienh, suenq ndaej cinj. Gou cihciz. Song boux sou cungj gaenx doengh uk naemj vwndiz, vanzlij fuengfap hix gig ndei.”

Dou dingq lauxsae gangj le fwt rox lo. Gou yawjyawj de, de yawjyawj gou, dou caemhsing naeuz: “Laxlawz fuengfap dou cungj gig ndei.” Couh yienghneix song boux dou mbouj caiq doxcwngq lo.

(sam nienzgaep Leiz Sunghloz)



Dak Buhvaq

晾衣服

“Dididi”, sijiyihgih yiengj le sam sing. Meh gou cingqcaih cat deihbanj, de doiq gou gangj: “Swjyenz, bang gou dak buh ndaej lwi?” “Ndae ha.” Gou dapwngq lo.

Gou cuengq roengz saej-

daeuz ndaw fwngz, hai aenfa sijiyihgih, dawz buhvaq okdaeuj cuengq roengz bat bae, yaeuj bae daengz yangzdaiz. Gou yawj baenzlai buhvaq, roxnyinh miz di dwgrengz, baenzlawz dak ne? Baenz geu baenz geu dak ba! Gou baenzneix siengj le, couh ra yihgya daeuj, sien aeu gen buh he cuengq haeuj yihgya bae, caiq aeu lingh gen hix cuengq haeujbae, doeklaeng yungh faetdakbuh dawz buh venj hwnj sienqakbuh bae, buh dak ndaej lo. Ciuq gij banhfap neix, gou dak liux buhvaq hung lo.

Buhvaq hung dak liux lo, lw roengzdaeuj haenx cungj dwg gij doxgaiq iq—vaqdinj, mad, sujbaq youq ndaw bat. Gou dajsuenq aeu gijneix dak youq aen yihgya miz nep haenx, vaqdinj nep youq mbiengj he, mad, sujbaq hix nep youq

mbiengj de. Gou yawjraen dak mbouj doiqcingq, gou dwg boux vnz guh gijmaz cungj dwg guh ndaej caezcingj he, gou mbouj ndaej hawj gij doxgaiq neix dak ndaej nyeng bae nyeng dauq. Gou sikhaek dawz gij mad caeuq sujbaq nep gvaq lingh mbiengj bae. Yienghneix song mbiengj itiyengh naek, dak ndaej cingq lo.

Yawj gij buhvaq gou dak haenx, gou lij gamjdaengz miz gizlawz mbouj ndei. O! Gou siengj hwnjdaej lo: Buhvaq saeg ndaej le, lij aeu bengbeng ragrag, yienghneix buhvaq cij mbouj nyaeuq.

Buhvaq dak ndaej le, gou cingj daxmeh daeuj genjcaz, daxmeh yawj le haenh gou naeuz: Mwngz dak ndaej gig ndei.

(sam nienzgaep Cwnz Swjyenz)

Gyanghaet Ndoengfaex Hung

大树林的早晨

Youq ndaw singgo sepsat duzroeg, daxgoeng daengngoenz ndiu lo. De ietnonx mbat he, daenj buhfwj hajsak, menhmenh benz hwnj dingjbya, doiq doenghduz doenghgo ndaw ndoengfaex riu. Dujva riu dwk docih daxgoeng daengngoenz, mbawfaex ngafaex bienq ndaej engqgya heuyau lwenqmyam. Diuzdah youq ndaw ndoengfaex heux bae heux dauq. Duzmbaj humx dujva diuqfoux, gyoengq lingz youq ndaw ngafaex swenjjyaya diuq hwnj yat roengz, roeggungjcoz cix youq gwnz ngafaex dinghdingh angj geubuh vava loegloeg de. Saehaexma caeuq duzgyi doxiu youq henz dah doxdax buet, daeuq ndaej duzmou caeuq duzdoq riuhaha. Gyoengq bya caeuq



gyoengq gungq youq ndaw dah guh' angq, sinz hwnj baenz duj baenz duh langhraemx.

(sam nienzgaep Vangz Henzdaz)



Roeggacak

喜鹊

Geiq ndaej ngoenzhaenx dwg seizhah, gou cingq youq laj gofaex gyanghonth yietliengz. Sawqmwh, miz song duz roeggacak mbin daengz gwnz gofaex. Song duz roeg youq gwnz faex lumj aen liengj heuyauyau haenx hemq dwk, gou ndwn youq laj gofaex ngienx gyauej yawj gyoengqde.

Song duz roeggacak neix bwn daengx ndang miz mbaem caeuq hau song cungj saek. Gyauej, hoz, laeng caeuq rieng dwg saekndaem, ndaemndwt ronghlwenq. Song mbaq caeuq aendungx dwg saekhau. Ndaem hau song cungj saek, cang ndaej gyoengqde baenzneix seuqcingh, baenzneix ndeiawj. Daegdied dwg diuzrieng raezrangh, beij buenq aen ndang lij raez, sawj gyoengqde engqgya gyaunde.

Gyoengqde yaep he dingz youq gwnz ngafaex, yaep he dingz youq dingjranz. Diuzrieng raez cungj dwg baenz mbat baenz mbat ndiengq hwnj, daengx ndang hix riengz de baenz mbat baenz mbat saenz dwk, sawj vnz roxnyinh gyoengqde dwg baenzhaenx vuedbued dwggyaez. Caiq sijsaeq dingq singheuh goenqde, sing “ga—ciuciuciui! Ga—ciu! Ga—”, siudiuh yienzhaenx genjdanh, hoeng singsep goksag, mbouj lumj sing roegga “a, a” dandiuh, sawj vnz dingq le simnyap, caiq gyahwnj daengx ndang ndaemndwt, couh sawj vnz engq dwgcaengz lo. Mwh roeggacak hemq, diuzrieng hix doengzseiz hwnjroengz ndiengq dwk, sawj vnz engqgya maij de.

(Giz Cauh)